

pientibus, sed in propriis & principiis & conclusionibus artium & scientiarum discordat, laborantes circa apparentias in sophismatibus subtilitatibus, & de quibus sapientes non curant. In propriis igitur vel secretis vulgus errat, & sic diuiditur contra sapientes, sed in communibus sub lege omnium continetur, & cum sapientibus concordat. Communia verò pauci sunt valoris, nec propriè sequenda. sed propter particularia & propria. Sed causa huius latentiæ fuit apud omnes sapientes, quia vulgus deridet & negligit secreta sapientiæ, & nescit vti rebus dignissimis: atque si aliquod magnificentum in eius notitiam cadat, à fortuna illud per accidens suscipit, & eo abutitur in damnum multipliciter personarum atque communitatis: & ideò insanus est, qui aliquid secretum scribit, nisi à vulgo celetur, & vix à studiosis & sapientibus possit intelligi. Sic currit vita sapientum à principio, & multis modis occultauerunt à vulgo sapientiæ secreta. Nam alij characteres & carmina occultauerunt: multi verò alij per ænigmata & figuratiua, vt Aristot. dicit in lib. Secretorum: O Alexander, volo tibi ostendere secretorum maximū, & diuina prouidentia iuuet te ad celandum arcanum, & perficiendum propositum artis illius lapidis, qui non est lapis, & est in quolibet homine, & in quolibet loco, & in quolibet tempore, & vocatur omnium Philosophorum terminus, & inueniuntur in multis libris & scientiis, innumerabilia talibus sermonibus obscurata, vt nemo intelligat sine doctore aliquo. Tertio occultauerunt per modos scribendi: scilicet per consonantes tantum, vt nemo sciat legere, nisi sciat significata dictionum, sicut Hebræi, & Chaldæi, & Syrii, & Arabes scribunt: sed & Græci. & ideò est magna occultatio apud eos, & maxime apud Hebræos: quoniam Aristot. dicit in libro memorato, quòd Deus dedit eis omnem sapientiam antequam fuerint Philosophi: & ab Hebræis omnes nationes habuerunt Philosophiæ principium. Et Albumasar in libro Introductorij maioris, & alij Philosophi, & Iosephus octauo Antiquitatum libro hoc manifestè docet. Quarto, accidit occultatio per mixtionem literarum diuersis generibus. Nam sic Ethicus: Astronomus